

2 KOLINIT

Pawl inalet kweitan nimug nein Kolinit, silmānin tayakelesiys ven towen bikakins asisinap kalbaleb. Wankuyeim mo ipiyaves asisinap kalbaleb; mapuna asisinap bwanabwein bulagan ikow Titos, inow Pawl waseg. Mapuna imwāsaw Pawl, mo kwayuwein-vak silet ilel min-Kolinit pines.

Kweiboug mwasanin nag itams Pawl nakalei-wag waseg, mapuna ilel kwayuwein let towen, ikkānes. Anilivan-vak nilel silmānin muloul; ilana, “Mtowen Titos bikow mimuloul pines tasi-mavs tasiyas niyakelesiys Yelusalem waseg.”

Anilivan-vak nilel livānen nawotet moumouvit, peinan ititāvin, igeiguy bulagan Yeisuw, mapuna igeeg aban vena babaw waseg.

Nakabsilamaw

¹ Kalin nuwag min-Kolinit yakamiy.

Yey Pawl, takawein livānen Yeisuw Kelis, ye; peinan Yowbad nanon māwan. Yey soug bwadads Timotiy nakalel milet neiw, kuvinis, Yowbad natayakelesiys yakamiy ven Kolinit waseg, simiyas tasiyas tayakelesiys ven avakaein Akay waseg.

² Tamads Yowbad son daGuyaws Yeisuw Kelis bisiwyoubumiyo mo beitaw nuwamiy.

Aban igeeg tage ikalin nuwan

³ Kalin nuwem Yowbad. Mtownen daGuyaws Yeisuw Kelis Taman. Mtownen anmwanet ililabeids, mo itout nanouds.

⁴ Kweiboug abem igege labem vagan bakalabes tasiyas abes igege. E, bakalabes tasiyas Yowbad inalab to nilabem.

⁵ Kelis namouvit singay kalilivet, mo singay-vak ililabem.

⁶ Takinew abem bigeg mo bakalabeimiy vaganbeitout ninoumiy, peinan abamiy igege yakamiy. Takinew abem bwein, bakalabeimiy vagan beibwein abamiy. Yowbad ililabem mo kakamtilakeimiy vagan bukukwakins Yowbad bilabeimiy, magat bukwaptuleimiy waseg abamiy kalbaleb, mawan abem yakamey.

⁷ Kakakin-wan bukusesus bwein. Abamiy igege mawana abem yakamey, tage Yowbad bilabeimiy mawana yakamey.

⁸ Sigwey, awoum kutagouwawes kweiboug abem igege ven Esiy nakases. Singay kawtamat, kadokena kid mwamovem bo ikous.

⁹ Kadoki bo beiwemas; tage Yowbad tatawtoun, taykitun takanigs; bo ikaluweg abem kalbaleb vagan bakanamis mtownen bikatinabwem; awoum bakanamis waseg matawtoun tatinem.

¹⁰ E, kakita bakakanig tage Yowbad ikatinabwem; e, tut wanakoug mo bikatinabwem. Kaninamis-wan peinan bo bikatinabwem waseg abem igege.

¹¹ Yakamiy kulabemas peinan kuntougis Yowbad bikatinabwem; e, kunitougs simiyas babaw

gamag, mo biligen Yowbad, bikatinabwem, mo bikalin nuwads simayas yakamiy.

Pawl sivinan binekes min-Kolinit

¹² Amalivan tawtoun peinan kakakin-wan amasinap bwanabwein, kamnat. Nag mawan ven watinow sinapun, tage peinan Yowbad nisiwyoubum ivagem mo nakamlavag takamnat yakamey, amasinap bwein wasigeis babaw gamag, singay gog wasigeis yakamiy.

¹³⁻¹⁴ Imilet nakalel kuvinis amalivan didumwal, kamnat. Kalamwey-nen kukwakins; sivinag geg bukuyakousis sinap kamnat, mo tutan daGuyaws Yeisuw beiyum beim mo bukumwassaws pinem tawlimiyas yakamey, o yakamey-vak bakamwassaw pinamiy tawlimayas yakamiy.

¹⁵ Kweiboug akakina bukuyakousis amisinap kamnat, mo ivag sivinag wanmugwana baw bal-akwaneimiy sivay, vagan bukumwassaws sivay.

¹⁶ Ivag sivinag balakwaneimiy mo banoun ban Masidoniy; *bayum* baw, mo bukutaneigs ban Yudiy.

¹⁷⁻¹⁸ Awoum kudokes isisiyuw nanoug peinan nag aw. Ven watinow gimgilis mwasanin itimatamsa mav. Yey nag mawan, nag batam mav. Tabudabod tatoukum Yowbad.

¹⁹ Kweiboug sigwey Silvanos son Timotiy nakeiguy livanen Yowbad Natun Yeisuw Kelis; mtown nag itimatama mav, tut babaw beitam mounid.

²⁰ Mtown Kelis waseg tabanes youd babaw bwanabwein, kweiboug Yowbad nilivnek. Mapuna tayemens waseg Yeisuw, Yowbad yakawan silmanin.

21-22 Yowbad gog bo nivageids Kelis angamag simayas yakamiy, mo isekeids dawotets; mama-gina napulsilas bo isekeids Kululuwan tonen wanuwads, mo takakins ikayuseids.

23 Tage nag aw Kolinit, peinan nag sivinag bakaneimiy. Tabudabod Yowbad.

24 Nag peinan tayakeikay yakamey, tapwaloul waseg, nag. Kalabeimiy vagan bukumwasaws, peinan nukutawtouns mitapwaloul waseg.

2

1 Kweiboug nanoug mawan, awoum vayuwein baw, bavag amimwasin. Misinaka alel milet neiw.

2 Kadiloka bukuvages amnag beibwein. Kukin gog bakaneimiy mo bavag amimwasin, ta-kal bivag beibwein amnag; nag.

3-4 Imilet towen nalel, singay igege nanoug, woung singay moumouvit, sona gunvalam let towen alelel. Nag alelel vagan beivag amimwasin, tage bukukwakins singay asiwayoub wasigeis yakamiy. Agulivan bo alel gunalet waseg vagan tutan baw, nag bigeg nanoug amisinap kalbaleb waseg, peinan akakina-wan bo beivag amisinap bwein mo bamwasaw o yakamiy-vak bukumwasaws.

Biwidis ansinap takalbaleb towen

5 Bo alel milet towen vagan bayakwaneimiy, bakin bukwanawes aygag, o nag. Bo alel livanen teitan yakamiy takalbaleb. Mtowen nag iyageg nanoug agumwaneta yey, tage yakamiy; adok kakit-vak bo iyageg ninoumiy yakamiy. Awoum bikeikay wadoug wasigeis yakamiy.

6 Towen ansinap kalbaleb bo kumapus yakamiy; bo misinak. Nanoug mawan.

7 Nagein gog kadiloka bikanavin ninoumiy mo kunumlaves ansinap kalbaleb mobeitout nanon. Kadiloka kulabes gamag towen. Awoum singay nanon bigeg; bininuway mo biwtamat.

8 E, kadiloka kusiwyoibus gamag towen beibwein.

9 Wawun milet towen nalel vagan mamagina bayakwaneimiy mo bakin bukwanawes agulivan babaw, o nag.

10-11 Kal ansinap kalbaleb bukuwid kunumlev, yeys mawan banumlev. Kukin aveiyag bawid; pinamiy yakamiy wamatan Kelis, vagan basilbwed Seitan. Awoum towen bitawtoun wasigeis yakids. Kakakin-wan non kalbaleb.

Nag itaw nuwan Pawl

12 Misumkwey nan Tilowas vagan bageiguy livanen Kelis, daGuyaws mo ikaliyow gunaked silmanin inawotet.

13 Tage nag itaw nuwag peinan nag aban bwadag Titos, ven towen waseg. Mapuna alisawes, itaneigs, anoun an Masidonyi.

14 Kalin nuwem Yowbad, peinan Kelis waseg, tut babaw imimgwayem mo katakayway, kaka-timlakes sinapun Kelis ven babaw wasigeis, mamagina atanoun manisin iskwanes, simasim seikwan.

15 Bo iskwanemas, tasiyas Yowbad ikatinabwes sisiyas tasiyas biyagages; manisin amalivan mamagina Kelis inawotet silmanin Yowbad.

16 Tasiyas Yowbad biyagages biskwanemas mamagina kanig manisin peinan bikankanigs.

Tasiyas gog ikatinabwes biskwanemas mamagina mwamov manisin peinan biyamoves. Asteivin kadilokes mawotet towen? Adok nag ibabaw.

¹⁷ Yakamey nag mawan tayyaweids tasiyas, kalisiy sivines bigeiguis livanen Yowbad, vagan maysan bikawes. Tage amasinap kweitan, kamnat; Kelis angamag yakamey, Yowbad nisekem mawotet mo kageiguy wamatān.

3

Pawl ansinap

¹ Tabta livnem bwanabwein bakasekeimiy, ne? Nag. Gamag mwasinis sivines silet mamagina: “Takawein let towen ansinap bwein.” Nag ivag sivinem bukulel malet mawan, o gamag mwasinis bileles malet mawan, nag.

² Malet yakamiy, gamag babaw bivinis, mamagina bikines amisinap kamnat mo bikakins mawotet bwein. Nukutams waseg Kelis mo kumlavags mamagina let, Kelis nilel vagan gamag bivinis.

³ Yakamiy mamagina let, Kelis nilel, nakakow, kasekes tasiyas mo ivinis. Nag ilel pansel waseg, nag. Bo ilel waseg Kululuwan Yowbad tamwamov. Nag ilel wadakul mamanas, tage bo ilel wakates gamag yakamiy.

⁴ Mapuna kakapwapout wamatān Yowbad, peinan Kelis ilabem.

⁵⁻⁶ Nag kadilokem bakalivan bakalana, “Matawtoun tatinem mo kawtel mawan.” Nag. Yowbad natawtoun bo isekem mo ikadilokem bakakow livanen inakaleiwag kweivaw, mo

kasekeimiy. Kweiboug kaleiwag dakul waseg nilel tage kweivaw kaleiwag mo Kululuwan waseg isekeids. Kaleiwag towen nilel wadakul bikatimateids, tage Kululuwan iyamoveids.

Kaleiwag kweiboug o kweivaw

⁷ Kweiboug kaleiwag silmanin kanig, nilel wadakul, Yowbad nisek Moses nakaleiwag towen son mititeilin avakaein, ikatipel inek Moses, magin mo ikamnat; ilakamnat singay ee... mo iyenom-nen; Moses iyum, inekes tasiyas min-Yisleil; ta-mawan bikinbunikes magin, peinan mititeilin avakaein.

⁸ Tage kaleiwag kweivaw, Kululuwan waseg nisekeids son mititeilin singay avakaein.

⁹ Kweiboug kaleiwag waseg niyateles gamag iyagages; mititeilin gog nises. Tage kweivaw kaleiwag bikidumwäluds mo beivag mititeilin singay avakaein.

¹⁰ Mamagina kweiboug kaleiwag mititeilin bo ikous, peinan kweivaw kaleiwag mititeilin singay bo ilisow.

¹¹ Kweiboug kaleiwag nag bises bisigeg; tage kweivaw bises bisigeg, mapun singaya immteil.

¹² Danamis peinan kweivaw kaleiwag waseg bo bikatinabweids; mapuna takapwapouts.

¹³ Yakids nag mawan Moses. Peinan Moses bo ipulum magin vagan min-Yisleil nag bikines nakabiyokous mititeilin, peinan niyyenom-wan ee... mo ikous.

¹⁴ Tage ninous moumouvit, nag ikakins. Nagein tut towen ivnivins kweiboug kaleiwag, kweim towen igawa ililum mites. Nag ikines mititeilin Yowbad. Misinaka Kelis bikaliyow mo bikakins.

¹⁵ E, tut nagein towen ivinis Moses nakaleiwag tage kweim igawa ililum ninous. Nag ikakins.

¹⁶ Igaw, kukin kal bitouvin binek daGuyaws, mo bikaliyow kweim towen.

¹⁷ DaGuyaws towen mamagina Kululuwan. DaGuyaws Kululuwan bilikud mo biten wamnat.

¹⁸ Yākids bo ikaliyow magids, takikines daGuyaws mo imteilids, mo kakit kakit ikatlow magids imlavag māwana magin tonen. DaGuyaws inawotet towen, peinan kululuwan mav.

4

Tasiyas nag isimounids

¹ Yowbad inok nuwan yakamey, mo isekem mawotet towen. Mapuna nag kāgwey waseg.

² Bo kapiyev kalbaleb sinap, o aveiyag kalbaleb nisowmes. Nag kakatidavis gamag. Nag kakatilow Yowbad anilivan. Tage amalivan mounid, kamnat; kukinemas katamanaw wamtamiy, kuliganes amalivan, mo bukukwakins amasinap kamnat. Yowbad ikakin māwan.

³⁻⁴ Kukin aw-sinap bisowm makageiguy wanuwan; bo isowm wasigeis tasiyas takankānigs. Nag bikakins tasiyas. Nag isimounids. Peinan ven watinow gimgilis sitovek kalbaleb bo ivag ninous ikanig, vāgan livānen Kelis nag bimteilis tasiyas; Kelis takamnat tonen, mawana Yowbad.

⁵ Nag kageiguy livnem, tage livānen Yeisuw Kelis, peinan datoveks, o yakamey mitouwat yakamey, silmānin bakawtel Yeisuw nawotet.

6 Yowbad kweiboug nilivan, ilana, “Kadiloka kamnat bimteil ven, peinan dadub.” Mtowen bo imteil kateids mo takakins yakawanian Yowbad, nises Kelis waseg.

Pawl aban igeeg

7 Sinapun libalab wakatem mamagina veigun bwanabwein wanuwan kaynad kweiboug; peinan tougwey yakamey. Yowbad nakaleiwag mawan vagan babaw gamag bikakins tatonen natawtoun singay; yakamey nag.

8 Babaw gamag iyagagemas, tage nag kakalouw. Isunasun ninom, tage nag kapiyev wotet.

9 Bo iyagagemas, tage Yowbad nag ilisawem. Iwawemas, tage nag ikatimatemas.

10 Wom waseg kakokew Yeisuw inamouvit, vagan mwamovan Yeisuw mo bikamat wawom.

11 Igaw mwamov yakamey tut babaw biyagagemas bakakanig, peinan Yeisuw angamag yakamey, vagan bukukines mwamovan Yeisuw wawom.

12 Yakamey wanuwan kanig, tage yakamiy kumwamovs.

13 Kweiboug teitan nilel mamagina:
“Asimounid mapuna alivan.”

Yakamey kasimounid mawan, mapuna kalivan.

14 Kakakin Yowbad niyakit daGuyaws Yeisuw Kelis kanig waseg, igaw mo biyakituds sods Yeisuw, bitokeids simayas yakamiy bimayeids mo bitatomos wamatian.

15 Mawotet towen pinamiy yakamiy vagan Yowbad nasiwayoub biwekeimiy simiyas babaw gamag, mo bikalin nuwads singay, yakamiy o

yakamey; babaw y_akids bitay_akawns Yowbad waseg.

¹⁶ Mapuna nag kagwey. Kaleivids biguyagweys, tage Yowbad ikkativweis kululuwads yam katanok katanok mo tatawtouns.

¹⁷ Gamag iyagagemas, tage nuwanaw mo beikous. Wankuyeim anagids bivakaein, mamagina, Yowbad nasiw_ayoub nag beikous.

¹⁸ Youd tasiyas wamatads takines, tage nag taninuwes. Nuwanaw mo beikous. Tage taninuwes youd tasiyas nag takines. Yowbad navavag tasiyas nag beikous.

5

Dabunatums walbalab

¹ Takakins gog wouds mamagina buntuman ven watinow. Kukin bigulekwes, dabunatums kweitan nises, Yowbad nisekeids. Nag bitawlulavaw namad waseg. Bises gog bisigeg walbalab.

²⁻³ Igaw ven watinow waseg nitabwayouys, sivinads kid bitakatlawos wouds, dabunatums walbalab mo bitakawes. Awoum tayamkwaneids.

⁴ Igaw dabunatums towen nitasesus, ikubukub nuwads. Nag sivinad bitasem woud tasiyas, tage sivinad kweivaw woud bikatilow. Mamagina mwamov bikanpwen woun towen ipsapwas, mo beikous.

⁵ Yowbad bo ikatinabweids silmanin mwamovads, mo isekeids Kululuwan mamagina adalivatawns.

6 Tut babaw mo bitakapwapouts. Takakins igaw wadabunatums ven watinow nag tasitans sods daGuyaws.

7 Tasimounids waseg mo tawotets. Nag takines, nag.

8 Takapwapouts, sivinads bitalisawes wouds mo bitanekes daGuyaws.

9 Tut babaw sivinads aveiyag nikadok nanon, takinew sods kaleividts bitasesus o takinew bitalisawes.

10 Igaw babaw yakids mo bitatowas wamatan. Kelis aban waseg bikatkineids, mo bikaleiwag mapun dakalbalebs o dakamnabweins, bo ikunek dawotets ven watinow waseg.

Kweivaw gamag

11 Kagoul Yowbad, mapuna kakatimlakes gamag mo isimounids. Yowbad ikakin amasinap. Adok yakamiy-vak waninoumiy kukwakins-wan.

12 Awoum vayuwein bakakamtilakeimiy vagan bukukwakins amasinap bwein. Deisa bukukwakins amasinap bwein vagan bukukwayapams wasigeis yakamey mo bukwatimapus asilivan tasiyas ilansa, “Matuw̄avek bwanabweins,” tage situw̄avek wanuwes asisinap kalbaleb.

13 Gamag mwasanin idokemas takabalawein yakamey. Kukin bakakabalawein, kakabalawein silmanin Yowbad. Kukin gog ninom bidumwal, vagan bakalabeimiy.

14-15 Kelis nasiwayoub waseg bo isimkinem silmanin nawotet. Kakakina bo ikanig peinads babaw yakids; mamagina takanig babaw yakids,

mo tamwamovs silmānin nawotet mtowen, dawotets tatoneids awoum. Mtowen gog bo ikanig peinads, mo iyakit vayuwein.

16 Bo ikous makanuway kweiboug, mamagina gamag babaw idokes kalisiy bwein, kalisiy kalbaleb, peinan ikines askakin watoulan. Kweiboug māwan kadok Kelis takalbaleb; tage bo ikous makanuway māwan towen.

17 Kelis waseg bo bitamlavag kweivaw gamag. Kweiboug bo ikous. Kweivaw bo isap.

18 Yowbad nawotet towen, peinan itam Kelis silmānin lun bulukwan, mo ilun wasigeis yakids, mo isekeids dawotets vagan gamag babaw bo beitams waseg Yowbad inalun.

19 Peinan Yowbad son Kelis nises mo ilun wasigeis yakids ven watinow gimgilis. Nag inuw adsinaps kalbaleb vagan bimop, nag. Ilun wasigeis yakids mo isekeids dawotets vagan gamag babaw mo beitams waseg Yowbad inalun.

20 Mapuna kakokew Kelis anilivan. Yowbad bo iguyeimiw wudom waseg. Kelis anilivan waseg kaguyeimiw kadiloka kutams Yowbad inalun wasigeis yakamiy.

21 Kelis nag ivag ansinap kalbaleb tage Yowbad ivag Kelis mo imlavag mamagina sinap kalbaleb tonen peinads yakids, mo sods Kelis bitakawes Yowbad ansinap didumwal.

6

Ikalin nuwan min-Kolinit wasigeis

¹ Simey Kelis mo kawotet, kagilagel wasigeis yakamiy, kalana, “Awoum bukutams mav Yowbad nasiw̄ayoub waseg.”

² Bo ilivan gog, mamagina idibakeim yak, ilana, “Bo kadilok tut towen mo aligen amlivan mapuna alabeim yam towen nakatinabweim.” Kuninuways avei-tut ikadilok. Nagein gog. Nagein Yowbad mo bikatinabweimiy.

³ Nag kweitan abkalouw bakasein gamag wasiked; nag. Mata ge bakawotet kalbaleb mo bukuvtokemas livan.

⁴ Tage makawotet bukukines mo kukwakins mounid Yowbad natouwat yakamey. Singay kakaptulem moumouvit waseg, iyagagemas, abem igeg singay.

⁵ Bo iwawemas, iseinimas w̄adeil, bo ikawn̄aweins mav. Kawwotet ee... bo ikalālav nimem, nag kamasis bwein, kasesun-wan amamoun.

⁶⁻⁷ Tage amasinap bwein, nag kayamen asisinap kalbaleb, tage kasiwyoubus, Kululuwan Bwanabwein nilabem, mo kasinap bwein, masiwyoub mounid wasigeis gamag babaw. Amalivan mounid, Yowbad natawtoun waseg. Nakayyous sinap didumwal wuliyougwan wamakatay wamakimaw v̄agan bakatawtoun.

⁸⁻⁹ Kweitan tut ivnasemas, kweitan tut mo iyagemas. Kweitan tut idokemas kalbaleb; kweitan tut idokemas bwein. Ilansa, “Takatidavidavs tasiyas,” tage amasinap mounid. Idokemas tobwag gamag yakamey, tage Yowbad ikakin amasinap bwein. Idokes kid bakamt̄amat, tage bwein

sona mwamovem. Bo imapus amasinap; iwemas tage nag kakanig.

¹⁰ Kalbaleb kalivet mapuna igege ninom, tage kamw̄asaw tut babaw. Tasimavs yakamey tage kassekes gamag babaw mo iguyaws. Mawlioug nag, tage youd babaw yakameyana mavavag.

¹¹ O sigwey min-Kolinit agulivan babaw peinan nuwaneimiy waseg yeys nises.

¹² Nag kasinaleimiy. Tage yakamiyana nukusinalemas, mo kupiyavemas.

¹³ Ik̄alin nuwag yakamiy. Kadiloka bik̄alin nuwamiy yeys, peinan mamagina nitug yakamiy.

Kadiloka bipiyaves youd kalbaleb

¹⁴ Awoum kwativases simiyas tasiyas nag isimounids. Tabta sinap didumwal bikatuvas son sinap kalbaleb, ne? Tabta kamnat beimwas son dadub, ne?

¹⁵ Tabta Kelis beitam son Baloum, ne? Kukin bukusimounid waseg Kelis, amawan bukwaveiyons soum towen nag isimounid Kelis waseg?

¹⁶ Yowbad Tamwamov nabunatum yakids. Awoum bitatams tobwag yowbad youdanen waseg. Yowbad anilivan mamagina:

“Yey basik baninoun wanuwes tasiyas, siYowbad yeys o tasiyas gungamag.”

¹⁷ Yowbad anilivan mamagina:

“Kadiloka kulisawes tasiyas takalbalebs, kusinale.

Awoum kwabkwanes youd bwaboum, kupiyaves,

mo bikalin nuwag wasigeis yakamiy.”

18 “Yey bamlavag timamiy yey, o yakamiy nitug,
tawaw vinay yakamiy.”
Yowbad Tatawtoun anilivan mawan.

7

¹ Sigwey, Yowbad bo ilivnek youd tasiyas bwanabwein peinads yakids. Kadiloka bitawidis wouds bigimagim, o kululuwads bikamnat, mo beivag adsinaps kamnat tatonen, peinan tagoulus Yowbad.

Pawl ikakina asisinap ibwein mo imwəsaw

² Bikalin nuwamiy yakamey. Nag kayageg teitan gamag. Nag kasilakod. Nag kasilponay; nag.

³ Nag alivan mawan vəgan bakaneimiy, nag. Kweiboug alana, “Nuwaneimiy wasigeis yakamey nises; takinew bitamats simayas yakamiy; takinew tamwamovs simayas yakamiy.”

⁴ Akakin-wan amisinap bwein; singay ikalin nuwag pinamiy, mo ibwein nanoug. Igaw abag igege, tage amwəsaw avakaein.

⁵ Tutan makanoy nakam Masidoni mo mamouvit kalivet. Nag kamasis bwein peinan youd babaw iyagagemas. Wouds watoulan, naviy; tage wanuwads pwəyat.

⁶ Yowbad gog lilabes tasiyas ninous igege. Il-abem yakamey, peinan Titos neim.

⁷ Bo ikalin nuwag peinan akin Titos, bulgamiy iwyakeig, ilana, “Tasiyas asisinap bwein, akines. Bo ikalin nuwag. Tasiyas sivines yakoum, asimwasin waseg mo ivəlams, itoukums

peinam.” Aligen mo itaw nuwag, amwəsaw nag bikakit vagan.

8-9 Kweiboug milet nalel neiw kuvinis mo igeg ninoumiy; ye-yak igeg nanoug. Tage yakamiy igeg ninoumiy yam mwasanin mo kupiyaves amisinap kalbaleb; nagein mo amwəsaw peinan alel milet mo kuliganes aygag. Nag amwəsaw peinan ayageg ninoumiy, nag. Tage peinan ikanavin ninoumiy inek Yowbad. Bo ayageg ninoumiy, tage nag ayagageimiy yakamiy.

10 Magat Yowbad biyageg nanoud vagan bitapiyev adsinap kalbaleb, mogo bikatinabweid. Awoum bitapiyev Yowbad nakaleiwag towen. Magat bigeg nanouds peinan youd aveiyag ven watinow, tage nag bitanuways Yowbad, mtownen nag bikatinabweids. Bo bigak mwamovads.

11 E, kuvinis let mo igeg ninoumiy, ne? Bo iseiw nuwamiy vagan beibwein amisinap, ne? Mitawtoun waseg bo kupiyaves sinap kalbaleb; kuwenes sinap kalbaleb, sivinamiy gog sinap bwein; bo kutoukums, ne? Peinan kumapus simiy mtownen ansinap kalbaleb. Youda babaw waseg akakin amisinap bwein.

12-13 Bo alel milet nag silmanin simiy towen-nan takalbaleb, nag silmanin tayuwein towen simiy nisilkod. Silawun gunalet misinaka bukukines wamatian Yowbad singaya kuvnəsemas yakamey. Ninoumiy ibwein yakamiy, mogo ibwein ninom yakamey.

E, Titos ikineimiy mo itaw nuwan, imwəsaw. Yakamey-vak kakin mtownen Titos mo ibwein ninom, kamwəsaw.

14 Kweiboug nag asilponay mav, tage akayapam, adibek Titos, alana, “Min-Kolinit asisinap bwein.” Nag bayaweid vagan mo beivag agumwasin, nag. Mawan amalivan babaw mounid nakadibakeimiy, mo gunakayapam waseg Titos ikakin mounid.

15 Kweiboug amisinap kalbaleb, amipwayat; itatat woumiy, mo kutams towen Titos waseg, nukukwanawes aygag, mapuna nagein tut towen singay nuwaneimiy ivag waseg Titos.

16 Nagein amwasaw peinan akakin amisinap bo ibwein.

8

Muloul

1 Sigwey, ivag sivinag bukukwakins Yowbad bo ilabes tasiyas tayakelesiys ven Masidoniw waseg, mo imulouls bwein.

2 Abes singay igege. Tasimavs tasiyas, tage imwasaws avakaein, waseg imulouls singay bwein.

3 Bo ikadilokes mawan mo imulouls; ikous, mo imulouls sivyuein; singay sivines. Wamatag bo akin.

4 Bo igilagels wasigeis yakamey, ilansa, “Singay sivinem bakalabes tasiyas tayakelesiys Yelusalem waseg.”

5 Ninom nag mawan tage singay imulouls. Wanmugwana, tatineisina itames, daGuyaws nagamag o yakamey magamag tasiyas peinan Yowbad nanon mawan. Tatineisina itames, mo imulouls wankuyeim.

6 Titos bo isilamaw wotet towen wasigeis yakamey mapuna kadibek kalana, “Kadiloka k

- labes min-Kolinit vagan bimulouls bwein.”

7 Yakamiy kumugwas youd babaw waseg. Kusimounids bwein, kugeiguis bwein, amisinap avakaein, bo iseiw nuwamiy silmānin miwotet, o kusiwāyoubs bwein wasigeis yakamey. Kadiloka bo bukumugwas muloul waseg.

8 Nag tayakeikay ye, tage alivan māwan vagan bukukwakins ven mwasanin gimgilis iseiw nuwes muloul silmānin, mo bakin, mounid misiwāyoub, o nag.

9 Kukwakins nasiwāyoub daGuyaws Yeisuw Kelis, guyaw avakaein tage peinads yäkids mo imlavag tasimav towen. Tasimav towen bivägeids mo bitamlavags guyawaw yäkids.

10 Nanoug māwan. Kadiloka bukuyakousis wotet towen nukusilamaws bweilim nein wankuyeim. Yakamiy wanamug sivinamiy wotet towen. Wanamug-vak mo kusilamaws wotet towen, muloul silmānin.

11-12 Māwana niseiw nuwamiy nukusilamaws-yay, mo biseiw nuwamiy bukuyakousis muloul towen. Mivavag nises silmānin wotet towen. Awoum kuninuways, kulansa, “Nag aveiyag nises waseg ye.” Awoum. Bweina biseiw nuwamiy mo kusekes aveiyag mivavag nises, Yowbad mo bikalin nuwan peinan ninoumiy māwan.

13 Nag ivag sivinag mimuloul bivakaein singay, mo bigagab ven mwasinis simuloul, nag.

14 Misinak tut towen, peinan miwliyoug babaw kumulouls bwein mo kulabes sidayas, peinan tasimav tasiyas. Igaw siwliyoug bibabaw tasiyas

tasimavs, o bikabwag wasigeis yakamiy, mo bilabeimiy. Mamagina bo bikobobt-wan.

¹⁵ Livānen nises mamagina:
“Tasiyas kaeis nisiyavis avakaein nag ivag anatup,
tage tasiyas tasiyas nisiyavis kakit, kaeis bo ikadilok.”

Titos siney budan

¹⁶ Kalin nuwag Yowbad peinan nanon isek Titos mo sivinan bilabeimiy, māwana yakamey sivinem.

¹⁷ Kadibek Titos biwekeimiy, bo itam; tagé singay sivinan beiw, peinan nanon māwan.

¹⁸ Kakayabes biweis Titos son bwadads towen butun niliganes tayakelesiys ven babaw wasigeis, peinan singay bwein igeiguy livānen daGuyaws Yeisuw.

¹⁹ Tasiyas tayakelesiys mo isekes-vak nawotet mo simey towen katāvin ven babaw kakokew mimuloul, vagan bakalabeimiy, Yowbad yakawanān silmānin.

²⁰ Awoum gamag mwasanin bivtokemas livan, bilansa, “Muloul towen avakaein, tagé nag im-takavates bwein.”

²¹ Tagé sivinem beivag amasinap bwein daGuyaws wamatān, o gamag babaw wamtes.

²² Kakayeb siyas asteiy sisiy tatounun teitan bwadads. Tut babaw nakayakwen bwadads towen mo kaban ansinap tawtoun. Tut gog towen ikakina amisinap bwein, mapuna bo iseiw nuwan silmānin wotet towen wasigeis yakamiy.

²³ Veiyoug towen Titos ililabeig gunawotet waseg mo bakalabeimiy. Sisiy Titos gamag

tasiyas budidayas, tayakelesiys nikayabes silmānin Kelis nawotet bwanabwein.

²⁴ Kadiloka misiwayoub beibwein wamtes tayakelesiys babaw. Livānen misiwayoub nakadibakes tawaw tasiyas. Igaw bikineimiy mo bikakins amalivan mounid.

9

Bimulouls silmānin tasiyas tasimavs

¹⁻² Nag kadilok balel milet, balana, “Kadiloka bukumulouls silmānin tasiyas tayakelesiys,” peinan nanawana bo kukwakins. Bo iseiw nuwamiy silmānin wotet towen. Bo kukwatinages bweilim nein wankuyeim. Yey adibakes min-Masidoni, alana, “Min-Kolinit, ven Akay waseg, bo iseiw nuwes, bo ikatinages simuloul bweilim nein wankuyeim.” Tasiyas iliganes, mo iseiw nuwes mwasanin, māwana yakamiy.

³ Yey mo akayabes budidayas biwekeimiy, alana, “Bo ikatinages simuloul, nises.” Awoum biwekeimiy mo bibānes agulivan yaweid, awoum.

⁴ Igaw wankuyeim mo bakaw sigwey min-Masidoni mwasanin. Kukin nag kukwatinages mo beivag amamwasin, peinan tayyaweid yakamey. O yakamiy-vak beivag amimwasin seikwan.

⁵ Adok kid kadiloka budidayas tasiyas bimgwayeigs, alana, “Kumgwayeigs kulivakas simuloul towen nilivānes. Igaw baw mo bitāmes simuloul towen beibwein. Awoum tasiyas bidokes muloul mamagina kid pāyin, nag.”

6 Kadiloka kukwakins silawun, peinan muloul māwana youpeis. Kukin youpeis bisapwes nag ibabaw mapun mo bitayoys kakit. Kukin gog youpeis babaw mapun bitayoys babaw.

7 Tatanok tatanok gamag yakamiy, kavel nanon māwan, bweina bimuloul māwan. Awoum kumulouls sona miwnayuw, kadiloka kutams-wan kusenas mimuloul. Yowbad gog sivinan gamag bininatouts mo bimulouls.

8 Yowbad nasiwāyoub kadiloka bikatimweis bibabaw wasigeis yakamiy. Nag aveiyag bikābwag wasigeis yakamiy, vāgan bukumulouls bwein silmānin wotet babaw bwanabwein.

9 Livānen daGuyaws nises Bukitab waseg magina:

“Nawliyoug ilivelov, ivvagein issekes tasiyas tasi-mavs.

Ansinap siwāyoub bises bisigeg.”

10 Yowbad anyoupeis ivagein, isekes tasiyas tabgubags, o kads ivag mo isekeids bitakams. Mtowen bo bikatimweis amiyoupeis bibabaw, mo bivag bisibwāsobs bivakaein vāgan bukusiwāyoubis waseg; anagin mo bukubānes.

11 Mamagina bukumliguyaws yakamiy mo bukusiwāyoubis bwein. Yakamey bakalabeimiy, mo gamag babaw bikavasis Yowbad.

12 Miwotet town waseg kulabes tayakelesiys tasiyas tasimavs, mo gamag babaw bikavasis Yowbad.

13 Mamagina Yowbad iyakwaneimiy. Kukin bukusimounids, o bukutams waseg livānen Kelis, mo bukumulouls bwein silmānin tayakelesiys

tasiyas tasimavs, sisiyas babaw gamag. E, tasiyas tasimavs mo bikavasis Yowbad.

¹⁴ Gamag tasiyas sivines yakamiy, initougs Yowbad waseg vagan bilabeimi, peinan Yowbad bo ilabeimi mo nukumlavags tasiwayoub tatonen yakamiy.

¹⁵ Nag bitalivan, Yowbad nasiwayoub singay avakaein. Kalin nuwads silmanin Yowbad.

10

Pawl nawotet

¹ Hey Pawl toneig-wan agilagel wasigeis yakamiy. Peinan Kelis ansinap bo iyamanum. Hey agusinap-vak wamtamiy aymānum tage kulansa, “Kadiveiyov nises mo iwon.”

² Agilagel wasigeis yakamiy. Igaw mo baw nag sivinag bawon bakaneimiy, awoum. Mwasanin yakamiy kuvtokeigs livan, kulansa, “Paul nanon tatonena iwtel.” Kukin nag bikanavin ninoumiy mo baw bakaneimiy, Yowbad natawtoun waseg.

³ Hey guntawtoun nag mawan ven watinow sinapun. Nakases ven watinow tage nag kakanaviy mawan tasiyas ven watinow gimgilis.

⁴ Nag kakokew naviy wuliyougwan, tage libalaba wuliyougwan kakokew, mo ikadilokem bakatawtoun Seitan nakaleiwag waseg.

⁵ Mogo kagidem tawtoun livan son sinap kayyāpam; o kagidem sinap silabod waseg bisilbwades livanen Yowbad; mo katawtoun waseg nuway babaw, vagan gamag babaw mo bikanawes aygan Kelis.

6 E, bo batawtoun wasigeis yakamiy. Igaw bukwanawes kaleiwag babaw bwanabwein, mo bamop asisinap tasiyas takapidabs.

7 Askakin wamitamiy kukines. Tage kukin kal idok Kelis angamag towen, kadiłoka binuweig Kelis angamag yeyp, mawana towen.

8 Kukin bakaypom kaleiwag, nag beivag agumwasin. Peinan datoveks bo isekeig gunakaleiwag vagan bakatimweis amisinap bitawtoun. Nag isekeig gunakaleiwag vagan biyagateimiy.

9 Awoum balel milet tawtoun mo beivag amipw̄ayat. Awoum.

10 Gamag mwasanin ilansa, “Let waseg anilivan tawtoun, tage igaw beim mo bukukines aygan igwey, o nag igeiguy bwein.”

11 Kukin kalisiy asilivan mawan mo badibakes tasiyas, “Aveiyag balel walet igaw baw mo bavag wamtamiy.”

12 Nag ikadilokeig balana, “Yey agusinap tawtoun,” nag. Simiyas mwasanin asilivan mawan. Tasiyas gog iblabol ninous, ilansa, “Tasiyas asisinap bwein, yäkids bwein singay.” Tage nag ikakins sinap tatonen.

13 Yey misinaka balivan agusinap tatoneig o gunawotet tatoneig; peinan Yowbad bo isekeig gunawotet wasigeis yakamiy.

14 Kukin gunakaleiwag nag iwekeimiy Kolinit waseg mo balivan mav wasigeis yakamiy. Nag gog, wanmugwana bo asekeimiy livänen Kelis.

15-16 Nag akayapam kaleiwag waseg. Peinan nag tayuwein tawwotet iwekeimiy, nag. Adok kid

bukusimounids beibwein mo makaleiwag bika-timweis bivakaein wasigeis yakamiy, simiyas ven kadiveiyov gimgilis, tasiyas niweiw-o. Awoum bakayapam waseg wotet townen niwtel teitan gamag.

¹⁷ Kukin kal tallivek, awoum bilivan livanen ansinap tatonen; bweina bilivan daGuyaws livanen.

¹⁸ Yowbad nag bikaypom gamag kavel idok tonen ansinap bwein; tage Yowbad bikakin ansinap bwein, mo bikaypom.

11

Pawl nag mawana tasiyas takatidavidavs

¹ Yey alivan mawana takabalawein ye. Awoum bikawegweis woumiy, mo bakamtel nanoug.

² Yey apwakit wasigeis yakamiy mawan Yowbad ipwakit wasigeis yakamiy.

Bo abokeimiy simiy Kelis mamagina vin napt-abod binek namwan anmwænet. Sivinag mawan batokeimiy bukunekes Kelis.

³ Tage agupwæyat Seitan, peinan kweiboug mamagina mwatet ansinap tawtoun ikatidev Iv. Adok yakamiy mawan igaw bikatidaveimiy mo bukupiyaves tapwæloul kamnat waseg Kelis.

⁴ Nakageiguy livanen Yeisuw. Tage igaw kal beiw bigeiguy tobwag Yeisuw, o tobwag kulu-luwan biwekeimiy, o livan townen bwanabwein nukuliganes kukin bukupiyaves, mo bukutams tobwag livan waseg. E, bo kutams waseg, mwasanin yakamiy.

⁵ Takaweins livan towen, kudokes singay bwein gamag; tage nag bilaveigs ye.

⁶ Kukin nag balivan tawtoun, tage agusinap tawtoun. Youd babaw bo akatimlakeimiy ikous.

⁷ Kweiboug sigwey yakamiy nasekeimiy bwan-abwein livənen Yowbad. Nag kweitan muloul akow. Yey əbus vagan bayamweneimiy. Tabta agusinap towen kalbaleb, ne?

⁸ Mamagina nitavenos simoney tasiyas ven mwasanin tayakelesiys, peinan bo akow simuloul wasipalatan vagan bawotet yakamiy wamipaltan.

⁹ E, igaw kweiboug sigwey yakamiy nitasesus mo ikəbwag gunwuliyoug, nag anitoug wasigeis yakamiy. Sidayas gog min-Masidoni yimeis mo isekeigs.

Mapuna nag anitoug. Nag kweitan mumuloul avag vagan bimouvit wasigeis yakamiy, nag. Igaw nag bavag, nag.

¹⁰ Agulivan tawtoun towen. Nag teitan bisilbwed agulivan towen ven Akay waseg. Tabudabod Kelis.

¹¹ Wawun nalivan məwan, peinan singay asiwyoubumiy. Yowbad ikakin.

¹² Gunawotet məwan, waseg bavvalut ee... mo babob asilivan tasiyas nikayəpams peinan idokes siwotet məwana yakamey.

¹³ Tasiyas idokes tatineis takaweins livanen Kelis. Tayyaweids gog. Siwotet waseg ikatidavis gamag, peinan askakin məwana takaweins livənen Kelis.

¹⁴ Magen! Seitan-vak ivag ankakin məwana gum-libəlab, kamnat waseg.

15 Igagaba natouwat tasiyas bivages askakin mawan takaweins sinap didumwal. Sikabiyokous kalbaleb, peinan siwotet kalbaleb.

Tut babaw aban igeg Pawl

16 Vayuwein alana, “Awoum kudokeigs takabalawein ye.” Tage bukudokeigs takabalawein, kadiloka balivan kakit mawana tasiyas takabalaweins, mo kuliganes agulivan.

17-18 DaGuyaws nag ikaluweg agulivan vagan bakaypom sinap, tage bakaypom mawana takabalawein ye, mawana tasiyas ikaypamwes sinapun ven watinow.

19 Yakamiy kutams bwein wasigeis tasiyas takabalaweins, peinan adok amisinap tawtoun yakami!

20 Bukutams bwein, kukin kalisiy bikaweimiy binaweimiy silmanin siwotet bukuwteles, o kukin bikwekways mivavag o bisilkodeimiy, o bikaypamwes asisinap, mo beiweiys mitamiy. E, mo bukutams waseg mituwavek tasiyas.

21 Nag ivag guntawtoun silmanin wotet mawana tasiyas. Mapuna agumwasin ivag. Kukin kal bitawtoun mo bikaypom; o ye-yak kukin batawtoun bakaypom mo bamlavag takabalawein ye. Tage bo bakaypom.

22 Adok tasiyas min-Ibliw. Yey mawan. Adok tasiyas min-Yisleil. Yey mawan. Adok tasiyas Ebelam delen. Yey bo mawan.

23 Adok tasiyas Kelis natouwats. Bo alisawes tasiyas. (Agulivan mawana takabalawein.) Yey alisawes wotet waseg, o deil waseg; peinan tuta babaw gamag niwaweigs, kakita bakanig.

²⁴ Sivanim min-Yudiy iyousigs mo iwaweigs vatul waseg. Vatul waseg biwaweigs babewein sinawatoun kweinim kweivas.

²⁵ Sivatoun iyousigs mo iwaweigs amweilok waseg. Sivtanok dakul ikawes, ilivelovs, imimekeig, iwaweigs. Sivatoun amukul wawag. Sivatan iyatuwaneig wakunuwatan yol katanok yam katanok boug.

²⁶ Tut babaw atitavín, alouvat youd kalbaleb nisesus wálay. Wakéd-vak tavveinaws tawayins gamag nisesus. Agugwamag sivines kid beiweigs; tobwag ven gimgilis sivines kid beiweigs. Sivines kid beiweigs waven o wanawoud o wabwanit. Sidayas tasiyas tayyaweids beiweigs kid.

²⁷ Gunawotet waseg son agupulikas, sona moumouvit; nag amasis ibwein, agumoun, agudak, tut babaw ikamateig moun, son aguloulun amasis wamnat.

²⁸ Sona youd tasiyas yam katanok katanok ikubukub nuwag waseg imouvit gunawotet wasigeis tayakelesiys vena babaw.

²⁹ Kukin kal beigwey mo bigeg nanoug; o kal bikalouw mo bikapasal nuwag peinan youd towen ivakaben.

³⁰ Kukin balivan, peinan vágan bukukwakins amawan tougwey yeys.

³¹ Awoum bayaweid. DaYowbads, daGuyaws Yeisuw taman, ikakin agusinap mounid. Kalin nuwads Yeisuw tut nag beikous.

³²⁻³³ Ven Damasik waseg, tutan Aletas king ven towen waseg, Tanuwagan ven inagamag ikaymates awkwedan ven, sivines kid biyousigs. Tage taliwog ikaliyowes sintaboul ven boul-nen

waseg, yeys asin wanuwan kaynad, ikaygwag-weigs ee... an aton watinow, anoun, mo alisow towen nikamliweig.

12

Inoun ikin libalab

¹ Bo bakayapam. Nag bilabeig; tage bakaypom sinap, peinan daGuyaws sinapun bo akin, isisawl matag, mo ikatimlakeig.

² Sinawatan kweivas bweilim nein wankuyeim taw teitan waseg Kelis inoun libalab kasilitoun waseg. Adok won waseg o adok kululuwan waseg. Nag akakin. Yowbad ikakin.

³ Yowbad bo ikow taw towen inow naven bwanabwein waseg. Adok won waseg o adok kululuwan waseg. Nag akakin. Yowbad ikakin.

⁴ Libalab waseg gamag towen iligen sinap kweit-an. Nag kadilok gamag bikamtel o bikavteg ven watinow; bwaboum.

⁵ Bakaypom ansinap taw towen, tatoneig awoum. Misinaka balana, “Tougwey yeys.”

⁶ Tage kukin sivinag bakayyapam, nag beibol agulivan, nag bayaweid, peinan mounid agusinap. Tage nag bakaypom sinap. Misinaka kukines agusinap o kuliganes.

⁷ E, Yowbad bo ikamtilakeig sinap babaw. Tage nag sivinan bamwasaw avakaein; mapuna ivag kaligweg kweitan kakat ibes viniyonag, mama-gina Seitan nagamag towen ivvasiganig. Mata ge bamw̄asaw avakaein.

⁸⁻⁹ Sivatoun anitoug silmanin daGuyaws bikablev youd towen, tage bo ipiyev, ilana, “Guns-iwayoub bo ikadilokeim. Mugwey waseg mo

bikamat guntawtoun.” Singay sivinag balana, “Tougwey yey,” vagan Kelis natawtoun mo bimekeig.

¹⁰ Mapuna ikunakeig gunagwey, yagay, moumouvit, silakod, o aveiyag biyagageig, peinan Kelis angamag yey.

Igaw tougwey yey tage wanuwag tawtoun.

Pawl ikubukub nuwan silmanin min-Kolinit

¹¹ Mamagina takabalawein agulivan towen. Peinan kusimkineigs. Tage kadiloka bukwavasigs. Takaweins livanen Kelis tasiyas tawtous nag ilisawegs, tasimav yey.

¹² Namag mulin gunawotet navvag bo kukines, singay tawtoun, o tut babaw akaptuleig, peinan mounid takawein livanen Yeisuw yey.

¹³ Aveiyag asekes tasiyas tayakelesiys ven babaw, tage nag asekeimiy yakamiy? Misi-naka youd towen. Nag akow muloul wasigeis yakamiy. Magat agusinap towen kalbaleb kadiloka kunumlavles.

¹⁴ Kakita baw mo beivag sivatoun bakineimiy. Nag bakow miwliyoug. Nag ivag sivinag mivavag. Sivinag yakamiy. Awoum nitug yakamiy bukumulouls waseg timamiy yey. Kadilokeig bamuloul wasigeis nitug yakamiy.

¹⁵ Bweina bavgen gunwuliyoug beikous o mwamovag beikous silmanin kululuwamiy. Sivinag yakamiy, mo bukupiyaveigs, ne?

¹⁶ Mounid nag akow mivavag, tage kulansa, “Bo ikatidavids.”

¹⁷ Tage tasiyas nakayabes niwekeimiy, tabta ikatidavimiy tan? Ne?

18 Bo aguy Titos vagan biwekeimiy, mo iweis son bwadads. Tage Titos ikatidavimiy tan? Ne? O yej agusinap amawan? Amasinap katanok-wan. Nag kakatidavimiy, nag.

19 Waninoumiy waseg agulivan mawana, vagan bikalin nuwamiy waseg yej? Nag. Kelis angamag yej alivan wamatian Yowbad. Sigwey yakamiy sivinag bakatimweis amisinap, mo bitawtoun.

20 Awoum bawekeimiy amisinap kweitan, bo bapiyaveimiy. Adok nag beivag sivinamiy agusinap towen. Adok kwammimans, imouvit dibamiy, kapasal nuwamiy, kusilakods, kuyagays, kuvtokays livan, kwayyapams sinap, mikaleiwag kalbaleb.

21 Awoum ge vayuwein baw mo Yowbad bivag agumwasin o bigeg nanoug wamtamiy. Magat taggeinawls tasiyas nag bipiyaves asisinap kweiboug kalbaleb o peinan ikaninavays mav.

13

Nakabiyokous anilivan

1 Igaw baw mo beivag sivatoun tut bakineimiy. Kukin bukuyateles simiy, amiteiy o amiteitoun bikavtagis ansinap kalbaleb, kadilok mo bukumapus.

2 Sivyuein nawekeimiy bo adibakes tasiyas takalbalebs sisiyas asibabaw, alana, “Kukin sivatounun baw mo bamop amisinap kalbaleb.” Tut towen kadiveiyov ases mo adibakeimiy mawan.

³ Sivinamiy bukukwakins Kelis ikatipel anili-van isekeig, waseg allivan. Igaw baw mo bukuk-wakins. Kelis ansinap wasigeis yakamiy nag igwey; tawtoun igegeyous.

⁴ Mamagina tougwey towen bo iweiys, ikati-mates waklos, tage bo imov, Yowbad natawtoun waseg.

Yakamey tougweys mawan Yeisuw, tage Yowbad natawtoun waseg bakamov simey Yeisuw, vagan bakalabeimiy.

⁵ Kuyakwaneimiy vagan bukukwakins, tabta kusimounids waseg Kelis, o nag? Tabta bukuk-wakins Yeisuw Kelis simiy kusesus? Ne? Tage kokin kal yak nag kusimounid, adok nag.

⁶ Sivinag bukukwakins yakamey bo kasimounid waseg Kelis, kawotet bwein.

⁷ Kanitoug waseg Yowbad vagan nag beivag amisinap kalbaleb. Kanitoug mawan, nag vagan gamag bikakins imawotet bwein. Tage sivinem amisinap beibwein. Kukin bidokes imawotet nag ibwein, bweina mawan.

⁸ Ta-mawan bakasilbwed sinap bwein. Deisa bakawotet silmanin sinap bwein.

⁹ Kamwasaw tougwey yakamey, peinan kutawtouns yakamiy. Kanitoug waseg Yowbad silmanin bikatimweis amisinap, bitawtoun.

¹⁰ Nagein kadiveiyov ases alel milet towen. Igaw baw, awoum bakaneimiy waseg gunakalei-wag daGuyaws nisekeig, vagan bakatimweis amisinap, bitawtoun. Gunakaleiwag towen nag vagan bayagageimiy, nag.

¹¹ Adok misinak agulivan sigwey yakamiy. Taneimiy-o. Kusinaps beibwein. Kunages

ungeiguy towen. Kutameimiy simiyas wasigeis. Niwal waseg kusesus; simiy daYowbads, ansinap siwayoub, niwal.

¹² Kumulouls beibwein simsimiya wasigeis, peinan Yowbad angamag babaw yakids.

¹³ Tasiyas tayakelesiys asilivan siwayoub wasigeis yakamiy.

¹⁴ DaGuyaws Yeisuw Kelis bikalin nuwan wasigeis yakamiy; Yowbad bisiwyoubumi. Kululuwan Towen Bwanabwein simiy bukusesus. Eimen.

Yey Pawl.

KALEIWAG KWEIVAW
The New Testament in the Muyuw Language of Papua
New Guinea
Nupela Testamen long tokples Muyuw long Niugini

Copyright © 1976, 1993 The Bible Society of Papua New Guinea

Language: Muyuw

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

PDF generated using Haiola and XeLaTeX on 11 Nov 2022 from source files
dated 9 Oct 2020

517ae3da-6769-54e8-8afd-7d53f958558c